

Karnavalista “Kristian”

Si nos hasi un enkuesta di e habitantenan di nos isla, no tin duda ku mayoria lo yama nan mes “kristian.” Probabelmente mayoria tambe ta di opinion ku nos ta biba riba un isla kristian. Hende ta yega na e konklushon aki pasobra un porsentahe grandi di e poblashon di nos isla ta bishitá iglesianan ku ta afirmá ku nan ta sigui siñansa di Kristo. Entre otro, senso 1992 a revelá ku 82% di e poblashon boneriano ta konsiderá nan mes katóliko, 3% evangéliko, i 2% ta protestant.

Ma nos ta kristian di bèrdat? Ora nos ta kòrda ku kristian ta nifiká “siguidó di Kristo,” esei ta lamta dudanan serio si di bèrdat nos por yama nos mes kristian. Ningun fiesta den aña ta muestra mas kla ku **nos ta kristian pa nòmber so** ku karnaval. Na e temporada aki, hidonismo ta manda, hende ta biba pa plaser, paranda ta bira un birtut, indesensia i aktonan parotin ta aseptabel. **Esei no ta kristianismo. Ta paganismo!**

Ningun hende sinsero por bisa miéntras e ta djòdjò den nos fiesta libertino aki ku e ta siguiendo Kristo. Kristo nunca a kore paranda i sigur a kondená esei komo piká. Pensa un ratu tokante dos ingrediente ku lastimamente a bira inseparabel di karnaval.

1) Alkohòl. Palabra di Dios ta bisa “*no bebe biña bira burachi, pasobra esei ta libertinahe*” (Efesionan 5:18). “*Biña ta hasidó di bofon, bibida stèrki un borotadó; i esun ku ta bou di su influensia no ta sabí*” (Provèrbionan 20:1). Ma tur hende sa ku **alkohòl ta hunga un ròl sùmamente importante den karnaval**. E serbes ta hasi e konsenshi insensibel. Hende ta bandoná i asta lubidá moralidat. Nan ta kometé aktonan bou influensia di alkohòl ku nan lo a evitá ora nan tabatin nan sano huisio. Nan ta zoya, nan ta balia, nan ta gosa...te sumanesé ora nan ta lamta ku doló di kabes, duele, i bèrgwensa pa loke nan a hasi.

2) Aktonan kontra moralidat. Beibel ta deklará “*esaki ta e boluntat di Dios...apstené boso di inmoralidat seksual*” (1 Tesalonisensenan 4:3). “*Hui for di inmoralidat...e hende immoral ta peka kontra su mes kurpa*” (1 Korintionan 6:18). Dios ta prohibí **tur** inmoralidat seksual. E nunca a fiha sierto dia ku ta pèmití pa tene relashon seksual ku un pèrsona ku no ta bo kasá. Paganonan si ta pèmití esaki. Por ehèmpel, na stat di Korintio antiguo, un parti di e adorashon di Afrodite, e diosa di amor, tabata relashon seksual ku un di e mil saserdotenan-prostituta. Nos tur sa ku sèks deskabeyá tambe ta hunga un ròl den karnaval. Nos asta sa bisa ku un beibi ku ta nase nuebe luna despues di karnaval ta un beibi di karnaval. Kondukta asina ta kuadra pa hende ku ta yama su mes “kristian”, un siguidó di Kristo? **Esei ta paganismo!**

Bo por insistí pa tòg gosa e paganismo di karnaval. Ma kòrda e palabranan di Beibel: “*Regosihá, hóben, durante di bo hubentut, i laga bo kurason tin plaser durante di e dianan di bo adolesensia. I sigui e kamindanan di bo kurason i e deseonan di bo wowo. Ma sabi si ku Dios lo huzgabo pa tur e kosnan aki. ..Dios lo trese tur echu na huisio, tur kos ku ta skondí, sea bon òf malu*” (Elesiastes 11:9; 12:14). Dia ta bin ku bo tin ku duna kuenta dilanti Dios, i nada ta keda skondí p’E.

Karnaval ta un tempu ku hende ta sasia nan deseonan segun nan ta haña ta bon, ignorando tur instrukshon di Skritura santu...mèskos ku paganonan. Anto un par di dia despues di djòdjò bai gol, e mésun persona ta inisiá Kuaresma dor di bai misa pa tuma shinishi, keriendo ku e ta bon kristian.

Bon kristian? Bon siguidó di Kristo? Imposibel! Kristianismo no ta manera un bachi ku bo ta kita ora bo ke, anto bolbe bisti’è. Un kristian bèrdadero no ta un hende ku ta djòdjò durante karnavel anto ta plei santu durante Kuaresma. E no ta un persona ku ta religioso djadumingu anto ta biba segun e ta haña ta bon sobrá di siman. Un bèrdadero kristian ta sigui Kristo 24 ora pa dia, 365 dia pa aña. E ta un persona ku ta atmití na Dios ku e ta un pekadó, meresiendo kastigu eterno pa motibu di su piká, i ta konfia Hesu-Kristo so pa salb’è di su piká i e kastigu ku e ta meresé. Si bo no ta hasi e desishon ei, bo por gaña bo mes i otronan ku bo ta kristian. Pero di bèrdat, bo ta kristian pa nòmber so!